

दिनांक 03.04.2024

समय: 18.45 बजे

आकाशवाणी जयपुर-अजमेर  
प्रादेशिक समाचार।

- लोकसभा चुनाव रा दूजा दौर मांय प्रदेश री 13 लोकसभा सीटां माथे नामपाना दाखिल करण रो काल आखिरी दिन-हाल ताई 91 उम्मीदवार पर्चा दाखिल कीना।
- राज्य सरकार ऊपतू अंग लगावण बाबतू फर्जी एन.ओ.सी. जारी करण रा मामला री जांच सारु 5 सदस्यां री समिति बणायी।
- एसओजी पुलिस उप निरीक्षक री सिखावण ले रह्या 11 जणां ने गलत तरीका ऊं नौकरी हासिल करण रा आरोप मांय गिरफ्तार कीना।

अर

- प्रदेश मांय केई ठोड़ां मौसम पलट्यो- केई जिलां मांय बिरखा रा आसार।

000

लोकसभा चुनाव रा दूजा दौर मांय प्रदेश री 13 सीटां माथे नामपाना काल ताई दाखिल कर्या जा सकेला। ई दौर मांय हाल ताई 91 उम्मीदवार 143 नामपाना दाखिल कीना है। ई बीचे भारतीय जनता पार्टी अर कांग्रेस रा केई उम्मीदवार आज पर्चा दाखिल कीना। भीलवाड़ा ऊं कांग्रेस रा उम्मीदवार डॉक्टर सी.पी. जोशी पर्चो दाखिल कीनो। ई मौके राख्यी ज्यी नामांकन सभा ने राज्य रा पैली वाळा मुख्यमंत्री अशोक गहलोत, कांग्रेस रा प्रदेश अध्यक्ष गोविंद सिंह डोटासरा अर विधानसभा मांय विपख रा नेता टीकाराम जूली ई संबोधित कीना। टोंक-सवाईमाधोपुर सीट ऊं कांग्रेस रा उम्मीदवार हरीश मीणा ई आज पर्चो दाखिल कीनो। कोटा सीट ऊं भारतीय जनता पार्टी रा उम्मीदवार ओम बिरला ई आज नामपानो दाखिल कीनो। वां री हिमायत मांय मुख्यमंत्री भजन लाल शर्मा सभा कीनी। **जालोर** संसदीय हलका ऊं भाजपा रा उम्मीदवार लुम्बाराम चौधरी अर **पाली** संसदीय हलका ऊं भाजपा रा उम्मीदवार पी.पी. चौधरी ई आज पर्चा दाखिल कीना। पी.पी. चौधरी कानी ऊं पर्चो दाखिल करण रे मौके राख्यी ज्यी जनसभा ने भाजपा री प्रदेश सह प्रभारी विजया राहटकर, केबिनेट मंत्री राज्यवर्द्धनसिंह राठौड़ अर भाजपा रा पैली वाळा प्रदेश अध्यक्ष सतीश पूनिया सम्बोधित कीनी। चित्तौड़गढ़ सीट ऊं बहुजन समाज पार्टी रा उम्मीदवार राधेश्याम ई पर्चो दाखिल कीनो। ई सीट ऊं आज दो निर्दलीय उम्मीदवार ई नामपाना दाखिल कीना। लोकसभा चुनाव रा दूजा दौर मांय दाखिल करी ज्या नामपाना री 5 अप्रैल ने जांच करी जावेला

अर उम्मीदवार 8 अप्रैल ताई नाम पाछा ले सकेला। ई दौर मांय 26 अप्रैल ने वोट पड़ेला अर वोटों री गिणती 4 जून ने करी जावेला।

ई बीचे बागीदोरा विधानसभा सीट सारू उपचुनाव बाबत ई पर्चा दाखिल करण रो काम चाल रह्यो है। आज भारत आदिवासी पार्टी रा उम्मीदवार जय कृष्ण पटेल बागीदोरा सीट रा निर्वाचन अधिकारी सामी पर्चा दाखिल कीनो। नामपानो दाखिल करण ऊं पेली विधायक राजकुमार रोट समेत मोटी तादाद मांय लोग रैली निकाली। बागीदोरा विधानसभा सीट माथे उपचुनाव सारू ई लोकसभा चुनाव रा दूजा दौर सागे 26 अप्रैल ने वोट पड़ेला।

000

भाजपा रा राष्ट्रीय अध्यक्ष जे. पी. नड्डा आज झालावाड ऊं भाजपा रा उम्मीदवार दुष्यंत सिंह री हिमायत मांय जनसभा ने सम्बोधित कीनी। नड्डा कह्यो के महिलावां ने मजबूत बणावण सारू नारी शक्ति वंदन कानून बणावण सागे ई न्यारा-न्यारा जतन करी ज्या।

देश मांय बुनियादी ढांचागत विकास रो जिकर करता थकां नड्डा कह्यो के राजस्थान मांय रेल बजट मांय सात गुणा बधोतरी व्ही है। कांग्रेस अर सहयोगियां पार्टियां रा बारा मांय वे कह्यो के वां रो गठबंधन घोटाला करण वाळां ने बचावण अर पिरवारवाद ने आगे बधावण रा मकसद ऊं काम कर रह्यो है। दूजी कानी कोटा मांय भाजपा रा उम्मीदवार ओम बिरला री नामांकन रैली मांय मुख्यमंत्री भजनलाल शर्मा कह्यो के कांग्रेस रा राज मांय भ्रष्टाचार री कहानी लिखी जाती ही, देश आतंकवाद ऊं परेशान हो अर तुष्टिकरण री नीति रा तैत वोट लिया जाता हा। वे कह्यो के कांग्रेस गरीबी हटाई नी बल्कि गरीबां ने टगबा रो काम कीनो। दूजी कानी बाड़मेर मांय कांग्रेस रा उम्मीदवार उम्मेदाराम री हिमायत मांय राखी ज्या सभा मांय राज्य रा पैली वाळा उप मुख्यमंत्री सचिन पायलट कह्यो के भाजपा वायदा पूरा नी कीना, बल्कि केवल प्रचार कीनो।

000

राजस्थान कांग्रेस रा केई नेतावां समेत 113 नेता आज भारतीय जनता पार्टी मांय शामिल व्हे गया। आं मांय पैली वाळा सांसद, विधायक अर भाजपा ऊं बगावत कर र चुनाव लड़बा वाळा नेता ई शामिल है। भारतीय जनता पार्टी रा जयपुर मांय प्रदेश मुख्यालय मांय पार्टी री राजस्थान री सह-प्रभारी विजया राहटकर री मौजूदगी मांय श्रीगंगानगर ऊं कांग्रेस रा पैली वाळा सांसद शंकर पन्नू, पिलानी ऊं कांग्रेस रा पैली वाळा विधायक जे.पी. चंदेलिया, जे.जे.पी. रा पैली वाळा प्रदेश उपाध्यक्ष अर पैली वाळा विधायक नंदकिशोर महरिया भाजपा री सदस्यता लीनी। कांग्रेस छोड़ र भाजपा मांय गया शंकर पन्नू खबरनवीसा सागे बातचीत करता थकां कह्यो के वे पूरी जिदगी कांग्रेस रा निष्ठावान कार्यकर्ता बण र काम कीनो, पण कांग्रेस निष्ठावान कार्यकर्तावां ने चुन-चुन र मार्या।

000

लोकसभा चुनाव मांय वोट देवण वाळां री बत्ती ऊं बत्ती भागीदारी तैय करण सारू प्रदेश मांय आज ई न्यारा-न्यारा कार्यक्रम राखी ज्या। झुंझुनू मांय मेरा वोट मेरी आवाज कार्यक्रम रा तैत दिव्यांगजन रैली निकाली। जोधपुर मांय शीतला माता 'कागा' मेळा रे मौके स्वीप टीम री ओर ऊं खुद रा फोटो खींचण री ठोड-सेल्फी पॉइंट बणा र वोट देवण री अपील करीजी। मेळा मांय जनता ने सी-विजिल ऐप अर वीएचए री जाणकारी दे र वां ने डाउनलोड करण री अपील करीजी। सलूंबर मांय नृत्य नाटिका अर रंगोली समेत

न्यारा-न्यारा कार्यक्रम राख्यी ज्या। जिला रा सराडा, बलुआ, सेमारी, इसरवास अर नामचोत मांय मनरेगा रा तैत मजूरां अर आंगनबाडी कार्यकर्तावां ने निर्वाचन विभाग री न्यारी-न्यारी एप्स अर वोट देवण वाळां ने दिया जावण वाळा सुबीतां री जाणकारी दे र वोट जरूर देवण री सौगंध दिरायी। बूंदी मांय बुजुर्गा री चौपाल लगा र सगळां ऊं वोट जरूर देवण री अपील करी ज्यी। हनुमानगढ मांय 7 अर 14 अप्रैल ने सगळा मतदान केन्द्रां माथे “आओ बूथ चले अभियान” चलायो जावेला। जैसलमेर रा शहरी अर गांवांई हलकां रा सगळा सरकारी दफतरां मांय कर्मचारियां अर अहलकारां ने वोट जरूर देवण री सौगंध दिरायी।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है जोधपुर जिला रा शेरगढ रा श्रवणदान चारण रो संदेश-

000

भर्ती परीक्षावां मांय कथित गडबडियां री जांच कर रही एस.ओ.जी. गलत तरीका ऊं नौकरी हासिल करण रा आरोप मांय ग्यारह प्रशिक्षु पुलिस उप निरीक्षकां ने आज गिरफ्तार कर लीना। आं मांय दो महिलावां ई शामिल है। पुलिस उप निरीक्षक भर्ती परीक्षा 2021 मांय पास व्ह्यां पाछे अ सगळा राजस्थान पुलिस अकादमी मांय सिखावण ले रह्या हा। एसओजी सिखावण ले रह्या 15 पुलिस उप निरीक्षकां ने काल हिरासत मांय लीना हा। आं माथे खुद री ठोड़ दूजा ने इम्तिहान मांय बैठावण या पेपर आउट कर र पास व्हेवण रा आरोप है। एसओजी रा अतिरिक्त पुलिस महानिदेशक वी.के. सिंह आज खबरनवीसां ने बतायो के शंका वाळा और प्रशिक्षु पुलिस उप निरीक्षकां ऊं पूछताछ करी जा रही है। इण ऊं पैली आज संवारे एसओजी दौसा रा रेहवासी थर्ड ग्रेड अध्यापक रोशन लाल मीणा ने गिरफ्तार कर लीनो। एस.ओ.जी. रे मुजब वो हाल तांई राज्य सरकार मांय भर्ती री 16 अर केंद्र सरकार री चार भर्ती परीक्षावां मांय गलत तरीका ऊं शामिल व्हे चुक्यो है। ई सागे ई वां रे पांच परीक्षार्थियां री ठोड़ परीक्षा देवण अर वां ने नौकरी लगावण री ठा पडी है।

000

राज्य सरकार प्रदेश मांय ऊपतू मानव अंग लगावण बाबत् फर्जी एन.ओ.सी. जारी करण रा मामला अर गैर सरकारी अस्पताल मांय ऊपतू अंग लगावण रा मामला री जांच सारु चिकित्सा शिक्षा आयुक्त री सदरत मांय 5 सदस्यां री समिति बणायी है। आ समिति 15 दिन मांय जांच रपट पेश करेला। चिकित्सा शिक्षा विभाग री अतिरिक्त मुख्य सचिव शुभ्रा सिंह बतायो के समिति मांय राजस्थान मेडिकल काउंसिल रा रजिस्ट्रार, मानव अंग अर ऊतक प्रत्यारोपण रा प्राधिकृत अहलकार, आला कानूनी सलाहकार अर चिकित्सा शिक्षा विभाग रा शासन उप सचिव ने सदस्य अर नोडल अधिकारी-एनओटीपी रा सदस्य सचिव रा तौर ऊं नामित करी ज्या है। आ समिति ऊपतू अंग लगावण री फर्जी एनओसी रा मामला समेत न्यारा-न्यारा रिकॉर्ड री विगतवार जांच करेला अर जरूरी राय देवेला।

000